

Potpuna nacionalizacija Izborne komisije BiH

Visoki predstavnik, Paddy Ashdown, danas je donio odluku o povlačenju tri međunarodna člana iz Izborne komisije BiH, koja će se početi primjenjivati od kraja juna 2005. godine. Međunarodni članovi Komisije, viši zamjenik visokog predstavnika Werner Wnendt, šef Misije OSCE-a u BiH, Douglas Davidson i zamjenik šefa Misije, Victor Tkachenko, koji su prije i nakon izbora 2004. godine ostvarivali tijesnu saradnju sa četiri domaća člana Izborne komisije, izrazili su svoje puno povjerenje u rad svojih bosanskohercegovačkih kolega. U skladu s tim, oni su visokom predstavniku preporučili da je došlo vrijeme za potpunu nacionalizaciju ove institucije.

«Ovo je dodatni korak u naporima koje Bosna i Hercegovina poduzima kako bi poboljšala svoju reputaciju funkcionalne države» rekao je visoki predstavnik u svojoj današnjoj izjavi. «Nastavlja se trend preuzimanja odgovornosti kao i sve većeg broja nadležnosti za budućnost ove zemlje», dodao je visoki predstavnik. «Povlačenje tri međunarodna člana, kojima se zahvaljujem na odlično obavljenom poslu, predstavlja značajnu prekretnicu u sistematskom prijenosu nadležnosti na lokalne organe vlasti.» U vezi s tim, visoki predstavnik je naglasio da je tokom proteklog mjeseca ukinut i režim supervizije u općinama Žepče i Gornji Vakuf-Uskoplje.

«Prijenos izbornog procesa na građane Bosne i Hercegovine predstavlja historijski korak» rekao je šef Misije OSCE-a, Douglas Davidson. «Bosna i Hercegovina je na izborima u oktobru 2004. godine dokazala svoju sposobnost da preuzme odgovornost za proces koji je od ključnog značaja u svakom demokratskom društvu. Sposobnost BiH da organizira i provede nezavisne i slobodne izbore šalje jasnu poruku o napretku koji je ova zemlja ostvarila.»

OHR i OSCE očekuju od Izborne komisije BiH da zadrži svoju nezavisnost i profesionalizam u radu. OHR i OSCE će Izornoj komisiji i dalje pružati svaku vrstu podrške koja joj bude potrebna.